

康南海先生遺著彙刊
(十五)

蔣貴麟 主編

金	運	物	中
主	財	質	華
幣	救	救	救
救	國	國	國
國	論	論	論
論			

蔣貴麟

主編

宏業書局印行

中華救國論
物質救國論
理財救國論
金主幣救國論

康南海先生遺著彙刊

(十五)

中
華
救
國
論

中華救國論

中華救國論

孔子曰。大道之行。天下爲公。選賢與能。故書稱堯舜。而易稱旡首。春秋據亂之後。爲升平太平之世。禮于小康之上。進以大同。共和之義也。吾昔著大同書。久發明之。惟共和在道德物質。而政治爲輕。若誤行之。爲暴民無政府之政。可以亡國。今共和告成數月矣。慘狀彌布。吾亦國民。棟折榱壞。將同受壓。不能忍而不言矣。此稿草於夏初。今蒙藏已危。岌岌瓜分。蓋早憂之而恐無及也。康有爲識。

博夜也。大漠也。絕海無際。修途萬里。飛沙漩淵。霾霧塞空。前無轍迹。道無留者。盲人跨瞎馬而臨深池。瞽師爭秉柁而駕風浪。危乎險哉。未有逾此者也。

今共和告成矣。掃中國數千年專制之弊。不止革一朝之命。五族合軌。人心同趨。

矣。然或以爲共和已得。大功告成。國利民福。即可自致。則未然也。吾所深慮。卻願者。以共和雖美。民治雖正。而中國數千年未之行之。四萬萬人士未之知之。衆瞽論曰。冥行擿埴。吾慮其錯行而顛墜也。夫使當中國一統之時。稍有錯誤。民少受害耳。于國無關也。今何時乎。乃萬國競爭之日。列強羣迫之時。而驟行人人所未經之塗。人人所未舉之事。此吾所深憂。卻願。俛仰徬徨。而不能自己也。

左挾爐。右熾炭。隆冬重裘。而適爪哇星架坡。鮮不喝死。披文羅。曳霧縠。而行冰海度鮮卑之鐵路也。未有不凍斃者也。故物無美惡。事無得失。適宜者存。失宜者敗。一適宜而不能皆宜。亦終歸淘汰以盡耳。有時有地。苟不當其時。不宜其地者。未有一有能存者也。夏蒔荷于沼澤。秋滋菊于畦畹。則繁華絢鬧。苟少易之。則廢枯不生。豈能復華。愛花而藝之者。猶須得其宜。况愛國而欲其存立。望其強盛者乎。

魚嚼蝦。鳥啄蟲。人食鳥獸之肉。肆几筵。陳鼎俎。饗牛羊。切鷄鴨。吾人斟酌割獻。以吞以飫。以醉以飽。雖然。智者怵怵然驚懼哉。恐吾之亦將類乎彼也。睨大地。覽人

種。古今遞嬗。僕緣于大地上而立國者。以億萬計。部落小國。野蠻諸番。互併競吞。茲無論矣。或稱霸于一域。或策文明于一時。登埃及之古陵。陟雅典之故墟。我思古人。俛仰遺跡。慨遺種之垂盡也。求于錄士古京以北。頗有三刀蠶者。其埃及之遺黎耶。何面貌之似古像也。則是寥寥啓羅之大都會。殆絕無有也。遊印度之大廟。摩阿育之遺塔。登耶路撒冷城。而無大關所羅門之築石。觀其遺黎之畫哭。其神明之冑。非奴隸于人。則流離逐戮于異國者。皆是也。哀哉。惕惕于予心而不怡焉。

自余之有生而含識也。親覩英之帝印度。意之復立。普之霸德也。又覩埃及希臘羅馬尼亞布加利牙那威之自立也。然而非洲已瓜分矣。中亞各國滅于俄。突尼斯安南滅于法。緬甸亡于英。琉球高麗滅于日。阿富汗暹羅爲兩甌脫國。待時而盡耳。噫嘻乎。突厥波斯。內亂頻仍。半死半生。不善自治。豈能久存于競爭之世哉。今議分突厥波斯亦日聞矣。其中南美諸國。今藉孟祿義以粗存。然不久皆將併

爲聯邦。卽歐土諸小。若將來遇強霸者。一戰旣勝。均勢卽散。亦殆將合爲聯邦矣。讀左傳至戰國策時。二百餘國。不百餘年。併爲六七。今其時矣。書曰。兼弱攻昧。取亂侮亡。勢之自然也。兩人相持。兩軍相當。如對奕然。少有不及。敗亡從之。况復有樓而相伐。協以謀我者乎。頃者瓜分之說復昌。祕謀日急。吁嗟乎噫。立國于當今之世也。何以能免。今大地盛強者。不過數國耳。能生存者。不過數國耳。吾以何自立。以何免滅亡哉。昧昧我思之。骨折髮豎。魄動魂飛。不知所屆也。吾邦人諸友。早作夜思。左顧右盼。審吾中國之時地若何。而念茲在茲也。

夫列國競爭之國。與天下一統之國。其爲治法至反矣。夫一統之立國者。譬一室獨居。解衣高臥。但垂帳搖扇。以驅蚊蟲。斯可鼾睡矣。若競爭之立國者。譬獨將之守孤城。陷重圍。必將卒同心。老弱並出。攻守之具。繕備無缺。振勵精神。晝夜無怠。猶慮不保。若將帥內爭。士懷二心。號令不行。糧乏械缺。而執冰以嬉。執戈相殺。又遇連兵之合圍。以求保城。未之有也。

吾中國嚮者非國。而曰天下也。故其立國之法。與今大異。蓋經無限因革而得之。粗舉大綱。而疎闊聽民自由。不能詬爲不完備也。今非復一統之時。而爲列國競爭之國矣。前朝蒙舊俗而不改。因應失宜。當孤城在重圍中。誤垂帳搖扇而鼾睡。此所以敗壞而召民怨。不崇朝而致亡也。今共和告成矣。然對於各國。則共和與否無關也。但視其國治完整。生計富足。兵力精強。比較之程度如何耳。其比較相若。則可平等。比較相遠。則爲所弱。無所比較。加以分亂。則只有滅亡。或以爲共和已得。卽若大功告成者。嗟乎。此乃圍城中將帥爭權之事耳。雖能逐專命之帥。而還顧重圍。雲梯衝衝。旌旂颺颺。強敵益壓。甚且因內爭之後。守具盡虛。糧食盡絕。臨陣易帥。士益不和。令益不行。裨將悍卒。爭位爭食。內亂益劇。以是而欲保孤城。以禦強敵。守境土而圖治安。駭其反哉。雖負床之孫。皆怵其危也。今吾國人。何以異是。故今之立國。舉國民精神所注。當視大地列強而一一比較之。而後國命生存。乃可得而定。而共和之始。尤當常目在之也。昔印度萬里之地。三萬萬之民。與

吾相等。而英人禁而籠之。東開加拉吉打。西開孟邁。南開密他拉士。張三面之網。而全印在籠中。內爭內亂。終爲英人驅除難耳。夫奕棋者。不深觀數着。而舉棋妄行。未有不敗。況絕無政策。而惟日以亂聞者哉。今吾國人若此也。此外人所竊睨而大喜。而有識所骨折而心驚也。今蒙藏已爲俄英不幸而言中矣

夫政治之體。有重于爲民者。有重于爲國者。春秋本民貴大一統而略于國。故孟子曰民爲貴。社稷次之。蓋天下學者。多重在民。管商之學。專重在國。故齊秦以霸。法共和之時。盛行天賦人權之說。蓋平民政治。以民爲主。故發明個人之平等自由。不能不以民爲重。而國少從輕也。及德國興。創霸國之義。以爲不保其國。民無依託。能強其國。民與榮施。以國爲重。而民少從輕。夫未至大地一統。而當列國競爭之時。誠爲切時之至論哉。日本採德制。以國爲重。故秩序綱紀嚴整。稅租甚重。一戰勝我及俄。而取高麗焉。今以美之共和。而自麥堅尼羅士福以來。亦復大昌霸國之義。小人譯爲帝國義未安。今易之。去其百年所守孟祿義。而增兵增艦。

東定古巴。西收呂宋。南繫巴拿馬渠。以臨太平洋。蓋時勢使然。國無共和專制。而必不能背時勢之所趨也。如倡德重國義于法革命時乎。則人心方注民權以裁奪君權。不暇及國也。故廬騷之流。應運而興。倡個人之平等自由。而蕩餘風于各國也。若倡法個人平等于今德霸大效之時乎。則法自由過甚。紀綱不能嚴整。國勢因之隳弱。各國皆以爲覆轍之鑒矣。故俾士麥羅士福之流。應運而興。寧犧牲人民而偏重國。以蕩餘波于大地也。

夫重民者仁。重國者義。重民者對內。重國者對外。雖然。重民者無所待于外。天下一統策也。重國者無不對於外。列國競爭策也。今吾國已無君主。無君民之爭。法國重民之義。已爲過去矣。今爲列國。非復一統之制。古者天下之義。更不切矣。列強競峙。力征經營。心摹力追。日不暇給。少遲已失。稍遜卽敗。然則以國爲重。乃方今切時之義。則吾中國欲生存強立于大地間者。應知所擇矣。方針既定。萬衆同赴。而後步趨不誤。祈嚮得宜。進行乃可見效。否則盲人騎瞎馬。當黑夜。惟有顛陷。

而已矣。雖然。個人之義。與立國之義。至相反而至相妨也。夫鄉郡之感情多。則分權重。而無全力以立國。少數之派別張。則爭黨劇。而無暇日以及國。若其挾軍興之形勢。踞燭籠之氣燄。擁兵爭權。圖利營私。而不顧國家之大計。民受其害而國因以危。此則爲爭巢危幕。而忘大廈之傾。與于不智之甚者矣。

今共和爲治。以民爲主。姑舍保國之重。而先求保民之法乎。考美國憲法最重之權利法典。爲保人民身體之自由及財產之安固。各國同之。美各州憲法尤重此義。皆首舉之。有二十六州明定之曰。人民皆享受保護其生命自由。與天然權利。又曰。凡自由政府。以人民之權威爲基礎。政府爲謀人民之平和安寧幸福及保護財產而設之者。南州路易詩烟拿之憲法。尤深切著明曰。凡政府自人民而起。本人民之意志。因人民之幸福而設立。其唯一之正的。在保護人民。使享有生命自由財產。此數語乎。眞共和國之天經地義矣。今共和數月矣。所聞于耳觸于目者。悍將驕兵之日變也。都督分府之日爭也。士農工商之失業也。小民之流離餓

斃也。紀綱盡廢。法典皆無。長吏豪猾。土匪強盜。各自橫行。相望成風。搜括則擇肥搏噬。仇害則焚殺盈村。暗殺則伏血載途。明亂則連城陳戰。搶掠于白晝。勒贖于大都。脅擊于公會。騷擾于城市。以至私抽賦稅。妄刑無辜。兵變相望。叛立日聞。莫之過問也。烽火一驚。民逃無所。但觀京津之變。損失逾萬萬矣。武昌南京。更迭告變。若江西貴州四川福建陝西新疆福建山東之爭亂。更無已時矣。各省皆是。粵黔最甚。士夫豪富。走之上海。避匿租界。而上海租界達官某某亦無免焉。炸彈日鳴于社會。手槍公行于朝堂。爭地鑿兵。風塵徧地。政府隱忍而癡聾。大官畏縮而被害。四萬萬人。無所控訴。婦弱惟轉溝壑。壯者只行劫盜。土田不耕。廩肆皆閉。杼軸既空。租稅無入。于是各省擁兵。而仰食于政府。日騰呼號之函電。政府仰屋而乞食于外人。甘受監理之脅章也。友邦未認。而庫倫自立。西藏失敗。片馬南甯。俄約又以黑龍江伊犁見壓矣。而薩克之馬。踏吾喀什噶爾矣。藥線四伏。火發無日。不知所之也。若其甘爲半主國。以漸爲保護國。爲瓜分國。則顯然有漸。且及身矣。

嗟乎。號爲共和。而實共爭共亂。號爲自由。而實自死自亡。號爲愛國。而實賣國滅國。吾國人而忍爲之乎。

今舉國士夫。上自政府議院。中及黨人志士。所早夜以思。密勿以謀。訐謔以告。剛斷以行者。蓋多矣。然于保教中國之道。豈獨茫如捕風。實亦適得其反也。政府數月擾擾。除改旗改服借債以外。殆無他政也。議院開數月矣。然皆毛舉細故。其乃日議女服。而未及富強之宏圖也。志士黨人。霧集波涌。摹法師美。異說雲起。而不及救切身之災也。嗟乎。各省悍將亂兵不能弭。國人身家產業不能保。民業士農工商不能復。直省蒙藏諸邊不能統。日惟厲精圖亂。躬行鼓吹。惟恐不及。而望外人之不監理。不分滅。何可得也。卽近者革命大爭。外人亦未干涉我也。惟今外人視我。如強盜。如乞丐。如兒戲。如沐猴。蓋數月來。實見我無立國之具矣。其考查益真。其輕蔑益甚。雖其初不見有窮迫之心。而今者如此。非獨不肯承認。亦不妨試其壓迫之行矣。夫各國號稱文明。又行均勢。豈必乘人之危。以亟行瓜分之策哉。

故經前清之亂政。而徘徊不動。又閱革爭之大亂。而旁觀隱忍也。然忍之既久。而我卒不能自治之也。我既不治。而日爭亂。其勢小之損礙其商務。大之牽入于戰禍。其萬難久忍者。亦人之情也。且彼久騰口說。以爲天下者。天下人之天下也。豈容劣種獨據之。故以爲文明人宜治野蠻人。乃天理之公也。此其說昌洋而大言之久矣。雖以共和之美國。然羅士福亦大倡之矣。而今之高談共和者。不圖長治而圖久亂。舍其大而謀其小。失其本而救其末。幾若安其危而利其災。惟恐各國之無所藉口。無所肆其耽耽之欲。而誘而導之。太甲曰天作孽。猶可違。自作孽。不可活。孟子曰。人必自侮。而後人侮之。國必自伐。而後人伐之。何其今之人真乃怨其國之壽而自伐也。嗟乎。五千年文明之中國。經無量數聖哲豪傑心思膏血之所締構。以有此大國者。傳至于今。而吾國民自伐自賁而自滅之。豈不哀哉。豈不痛哉。

且夫爲國之道。先求不亂。而後求治。若夫爲文明。爲平等。爲自由。又致治之後。再

求進化由升平以至太平者也。今以前清爲失政。而後發憤革之。雖然。昔者雖專制失道。而不聞悍將驕兵之日爭變也。不至人民身家產業不保也。不至全國士農工商失業也。不至蒙回藏不統一而圖自立也。故今者國民惴惴恐慄。或且悔禍。皆謂革命之舉。以求國利民福。不圖共和之後。反見國危民悴也。然以爲爲治失序。悔禍生怨。猶無大礙也。惟長此變亂。各國藉口。永不承認。久之且召瓜分。卽不爾而長此爭亂。全國塗炭。將釀第二革命之禍。法大亂八十三年。幸而能保。墨大亂三百年。削地萬里。至今未已也。蓋共和爲平民之政治。所最可慮者。暴民爲政。貽國勢險危。此乃歐美之恒言。而今已暴發于吾國也。今政府議院方鎮與黨人志士。當共和之始基。應先去共和之大害。萬衆一心。聚精會神。圖所以先靖暴民之禍。而後安定有基。統一有效。故欲外人早認。借債易信。免監理之辱。絕瓜分之危。舍先弭亂無由也。欲籌款行政。保邊阜民。舍先弭亂無由也。卽欲進而講平等自由。文明幸福。亦必由弭亂之後。乃能進化也。天下未有舉國日亂。而能得文